

欽定剿平粵匪方略

欽定勦平粵匪方略卷九十三 甲寅年

五月初八日

丙午

勝保奏言高唐踞匪乘夜擁出

馬步數百人前來撲營經我兵轟擊敗退入城  
堅閉不出查高唐本爲南北通衢四面平衍道  
路紛歧必須分兵圍勦方能杜其竄越之路在  
平爲往來大道已由臣與德勒克色楞選派吉  
林黑龍江馬隊前往擇要設伏以備邀截其夏

津一路卽派撫臣崇恩分撥之練勇三百名及青州馬隊堵截臣復飛檄東昌博平一帶地方官督率兵勇紳團將城守事宜趕緊布置儻遇賊至但能固守數刻大兵一到內外夾擊必可殄除臣仍一面飛催步隊並趕造攻具於一兩日內設法進攻該逆雖極兇悍計其人數不過千餘高唐州城垣周圍約八九里如能乘隙撲

入就地芟除最爲妥善惟恐連鎮餘賊從後撲至臣營馬隊不敷分撥計新調吉林馬隊一千名日內可抵連鎮該處勦辦亦在喫緊之際臣已飛咨僧格林沁將此項馬隊酌留五百名其餘五百名飭令麟瑞星夜管帶馳赴臣營以資圍勦奏入

上是之

同日舒倫保奏言臣於四月二十二日到武勝  
關探得應山各處賊匪均已遁至漢口一帶盤  
踞又湖北所屬地形卑隘馬隊難以馳驟擬量  
爲變通趨程前進不致貽誤並催續派官兵迅  
速來營以備調遣一面趕緊雇覓小車推載軍  
火前赴德安府與督臣台湧會商進剿奏入報

初九日丁未僧格林沁西凌阿善祿托明阿奏言

臣僧格林沁接奉

諭旨令查連鎮賊匪分竄培成那敷德堵禦不力情形

遵查逆匪分股逃竄時臣並未接據培成那敷

德稟報培成那敷德帶兵追賊亦未向臣告知

查東岸長濠東面北面先已工竣南面長濠初

一二日尙未完工臣因聞該逆竄出俱係馬隊

非將濠溝平墊斷難偷越逆匪分竄後臣周歷查看東面濠溝一律完整並無平毀情形其東面大道亦無人馬踐踏蹤跡是否係由東面潰竄應俟培成那敷德追剿事畢再行查辦該逆竄出時臣原欲撥兵協剿旋據生擒賊匪並各路哨探俱稱分竄逆匪不過千名勝保督帶馬隊數千名似敷追剿且大股逆匪仍踞連鎮地

方較大東南二面甚形空虛勝保等營追擊去  
後官兵已不敷兜圍並據獲賊供稱竄出之賊  
如探明前次南來賊匪實係剿滅仍回連鎮併  
夥是以更不得不極力慎防臣等連日督兵進  
攻用礮轟擊並將藏匿賊匪之附近小村全行  
燒燬該逆復乘風雨驟至撲出賊匪一千餘名  
又經我兵放箭射回因天時已暮藥繩器械無



不淫透祇得徐徐撤隊回營奏入

上諭曰連鎮之賊豈容其負隅日久又作詭謀現在兩  
逆已分首尾不顧正是

天假我滅賊時也若不上緊進攻待已出之賊復回連  
鎮連鎮之賊或南竄勾合無論其裹脅又多勦辦棘  
手遷延時日餉項何堪著速破逆巢盡殲醜類或誘  
之使出截剿無遺斷不能再寬期限也

僧格林沁又奏言副都統麟瑞帶吉林兵一千  
名於五月初六日馳抵軍營臣已飭該副都統  
暫在北面紮營至帶馬隊之侍衛綏闊達崇阿  
均係得力之員現在受傷未愈每遇接仗設伏  
差委乏人查護軍參領阿克東阿舒保前隨多  
爾濟那木凱在徐州等處防堵現已撤防應請  
飭下該二員迅卽來營以資差委奏入

上從之

同日四川總督裕瑞奏言臣接奉

諭旨令臣添派勁旅赴楚助剿遵卽會同將軍樂斌提督萬福悉心商酌川省邊腹各營官兵現在極形單薄實有未便再調之勢查有上年臣捐募練丁一千名分交省標十營操練半年以來該練丁等技藝純熟悉與制兵無異以之派往軍

聞

營可期得力又另抽調綠營兵丁一百名統交  
遊擊李昂帶領馳赴台湧軍營聽候調遣定於  
四月二十二日自省起程其雙保等管帶之防  
兵二千餘員名節經嚴催因距省較遠尙未據  
報起程計日內當已整隊東下奏入報

初十日  
戊申 僧格林沁西凌阿托明阿奏言臣等

接奉

諭旨令分撥大營步隊遵卽選撥步隊精兵四百名並  
得力練勇四百名令善祿於初九日統領馳往  
勝保軍營惟兵力旣分連鎮東南二面益形空  
虛不克兜圍臣等惟有嚴飭各營竭力防剿如  
該逆潰竄臣等卽督兵追擊奏入報

聞

同日荊州將軍官文副都統慶如貴陞奏言逆  
匪上竄德安等處失守以來分股攻撲宜昌府  
城經該處官民極力堵禦賊匪愈聚愈多大雨  
如注城身崩塌丈餘賊衆由缺口直入以致府  
城失陷查宜昌係荊州上游爲由川入楚門戶  
荆楚所需鹽糧一切莫不仰給於川現當江水  
盛漲之時儻該逆等擄船編筏順流而下不難

朝發夕至荊州駐防官兵僅贍二千數百餘名  
實屬不敷調遣急望川兵早到會合進擊前次  
奏調之松潘建昌二鎮官兵二千名屢經飛催  
至今尙無拔營信息查巴東利川由川北順流  
而下一日可抵宜昌恐該鎮等以賊至交界更  
宜守護川省門戶爲詞殊不思宜昌與四川唇  
齒相依護宜卽所以保川豈可觀望遷延臣等

復查荆門雖已收復仍恐宜昌賊匪勾結德安等處逆賊由安陸荆門南竄川路現經阻滯江路又復隔絕若再荆襄聲氣不通則西南半壁甚屬可慮爲今之計宜殲除此股逆匪爲急現在情形萬緊望援益切應請

旨飭下四川總督嚴催該官兵迅速前來助剿疏通川楚道路並請



飭令附近省分籌撥勁旅酌濟餉銀迅來荆襄應援以期掃蕩逆氛奏入

上命軍機大臣傳諭官文台湧青麀曰逆匪分股攻撲宜昌府城由缺口突入因而失陷此股賊匪是否卽由荆門荊州而來抑係湖南潰敗之匪沿江而上該郡爲由川入楚門戶此時各鄰省接濟餉需調撥兵勇均屬緩不濟急惟四川相距較近可以藉資援應

若不迅將該郡收復則川楚道途梗阻武漢德安一帶聲息又皆隔絕荊州一郡勢成孤懸四川駐紮巴東利川之兵四月中旬尙未據報起程赴援本日復降旨嚴催並令裕瑞將續撥之練丁一千餘名一併迅速馳赴宜昌俟此股賊匪掃蕩後再行酌量何處緊要派往調遣仍由官文就近迎提如帶兵之總兵雙保福忻有意遷延不進卽由該將軍嚴叅治罪官

文仍當督率荊州在城滿漢官兵力籌防守一面設  
法進勦一面勸諭紳民招募壯勇藉助聲勢地方兇  
悍之徒不爲官用卽爲賊所迫脅尤須斟酌緩急權  
宜辦理大江船筏急須密飭地方官吏妥爲收集勿  
爲賊有並須嚴防奸匪爲賊指使偷窺江隄此事尤  
關緊要仍須慎密籌辦台湧青麀均有地方之責雖  
相距較遠亦當妥籌兼顧豈得專管一隅於荆襄險

要情形竟置不問楚境賊匪疊陷郡縣若再令蔓延該督撫自問當得何罪

上又命軍機大臣傳諭裕瑞曰前以楚省賊氛甚熾諭令裕瑞將派防巴東等處之松潘建昌兵二千名令雙保等統帶赴楚助剿正月以來疊經嚴諭飛催昨始據裕瑞奏稱遵旨派往仍未將起程日期奏報川楚壤地毗連竊楚省之賊匪卽以固川省之藩籬裕

瑞於奉撥官兵延不催令前往是於事勢緩急全未  
審度且此項官兵若於奉撥後卽行赴楚協勦則安  
陸荊門等處不致失事又何至賊匪擾及宜昌祁瑞  
旣已遲誤於前若復心存畛域稍涉觀望罪將誰諉  
現在荊州待援甚急著裕瑞迅飭雙保福忻統帶前  
項官兵卽日兼程前進所派赴台湧軍營之練丁一  
千餘名並著飭令先赴荊州聽候官文調遣若再有

遷延情事卽將雙保福斫等嚴叅治罪以肅軍令

同日陳啟邁奏言據南昌府知府史致諤等稟  
報四月十一日忽有賊匪糾集湖北匪徒約三  
四千人並勾結土匪竄至武甯縣之京口已革  
都司宋光玉已革知府劉熾昌與都司海通等  
竭力抵禦奮勇衝殺不意賊匪愈聚愈多官兵  
衆寡不敵以致劉熾昌海通宋光玉鄧資揚均

力竭陣亡其餘弁目兵勇傷亡約二三百人該處與縣城小河阻隔適大雨驟至溪水陡漲天時已晚賊未能渡縣城有已革候補知府林懋勳卸署武甯縣知縣陶璽等帶領兵勇協團防守又有續派援兵前往或可無虞

陳啟邁又奏言據九江南康等府縣稟報四月初十日賊船數百號由湖口駛入姑塘青山游

弋並有另股逆匪千餘由陸路直撲九江之通  
遠等處竄入德安建昌二縣鄉間勾結土匪大  
肆焚搶市鎮爲墟經兵團截擊賊卽回竄鄉村  
境內尙未肅清又據袁州瑞州等府縣先後稟  
報十一二等日萍鄉萬載兩縣忽有由湖南敗  
竄逆匪數百或千餘分股結隊避過隘口潛越  
山徑闌入江境擄掠鄉村各處兵單堵援不及



以致竄擾宜春新昌各縣境現經宜春營縣督率兵勇民壯沿途截勦大獲勝仗殺賊無數新昌縣兵團截殺甚多餘匪四散奏入

上命軍機大臣傳諭陳啟邁曰武甯縣境又有由楚竄入逆匪勾結肆擾勢甚猖獗該處逼近義甯界連湖北各要隘現在全楚賊氛方熾而江西袁州瑞州九江等屬均有賊匪分竄若勦辦稍有遷延致該逆愈

聚愈衆南昌省垣重地亦不免因而震動該撫務當  
計出萬全迅籌扼剿之策一面添撥兵勇分投堵截  
一面激勵紳團協同守禦尤應隨時隨地嚴緝土匪  
盡法懲辦以免到處勾結消患未萌其近省水陸要  
隘並著嚴密設防以固根本仍嚴飭勸辦團練及帶  
領兵勇之林懋勳陶璽等設法固守武甯縣城務將  
此股竄匪相機殄滅勿令蔓延所有此次陣亡之已

革知府劉熾昌等並各員弁俱著確切查明一併請  
卹至九江德安及萍鄉等縣匪徒合水陸兩路滋擾  
情形該撫仍須妥籌策應並分飭所屬實力堵剿不  
得稍涉疏虞

同日雷以誠奏言探聞瓜州逆賊現築土城於  
江邊各處編釘木椿又於土城內設放槍礮水  
師兵勇勢難登岸琦善陸路攻剿旣阻隔運河

逆賊復於運河北岸添挖深溝數道又將舊城  
加高城根安置礮眼分三層施放故官兵未能  
得力又屢據江浦六合探報逆賊船隻或由金  
陵上駛至廬州接應或赴江西湖廣或由廬州  
敗回金陵每次自十數隻至二三百隻不等又  
聞湖廣商販木簞大半爲賊所有現欲造船數  
百隻並多鑄大礮如果屬實則製備齊全蔽江

而下恐非數十號師船所能抵禦此時用兵應以趕緊截燬賊船爲要臣已密函知照安徽撫臣福濟於瀕江各屬遴委幹員就近確切查勘何處可以扼險設伏爲暗地焚燬賊舟之計俾逆賊聞之到處驚疑不敢肆行無忌庶幾我軍得以相機合剿現聞所調廣東紅單船五十隻計日可到應一面檄飭江浦六合及沿江一帶

燒燬賊船一面將所調之紅單船並現存各船  
分作三軍前軍駛過金陵駐泊兔兒磯以截江  
安往來之賊中軍駛赴瓜州以上駐泊土橋與  
琦善陸路之兵合剿以杜金陵往來之賊後軍  
仍泊焦山以防下竄均宜派統領副領各一員  
以專責成一遇賊船卽行轟擊務使賊船不得  
往來賊勢自然窮蹙奏入

上命軍機大臣傳諭琦善向榮曰逆匪由金陵揚州上  
竄湖北湖南旁擾江西安徽皆以擄船爲事沿江一  
帶毫無阻截琦善向榮僅於陸路進攻又不能剋期  
收復致令賊船來往自如若不急圖肅清江面何日  
始能戢事本日據雷以誠奏逆賊又有搶奪商販木  
簞造船添礮情事如果屬實江面賊船愈衆瓜州艇  
師船旣無多且在下游湖南江西水師船又皆爲本

省賊匪牽掣聲勢不能聯絡因思廣東所謂紅單船  
日內當可駛入大江若將此項船隻與現存各船分  
作三起前起駛過金陵駐泊兔兒磯以截江安往來  
之賊中起駛赴瓜州以上駐泊土橋與琦善合剿瓜  
州後起仍泊焦山以防下竄瓜州一經克復卽將後  
起之船上偪五龍山觀音門一帶堵剿中起之船上  
泊兔兒磯與向榮大軍夾攻金陵前起之船駛赴攔



江磯安慶一帶進勦並知照和春福濟瀕江設伏爲  
暗燬賊船之計似此節節堵截使賊不至肆行無忌  
陸路諸軍方可得手若瓜州廬州兩處克復一路自  
鎮江泝流而上一路自安慶沿流而下會勦金陵傾  
其巢穴自不難逐漸掃除琦善向榮頓兵大江南北  
並未攻克一城爲朕分憂朕博採衆論審度機宜非  
用水師橫擊江面不能制賊之命現在紅單船隻爲

數不少職勇均可得力著琦善向榮於接奉此旨後  
妥速會籌迅卽密商布置此係江面全局非專爲東  
南三城起見該大臣等如有善策較此辦法尤爲扼  
要者亦著速議奏聞總期水陸兼籌不分畛域以清  
江路

十一日 己酉 勝保奏言賊踞高唐州城每於夜間  
突出衝撲意欲奪路而奔俱經我兵擊回連日

賊在城外挖濠以阻我兵進攻之路復經馬隊  
隨時擊散又於東南西三關立柵築壘仍思起  
造木城爲犄角之勢其意欲待連鎮賊至再圖  
抗拒臣商令德勒克色楞攻其南關派培成那  
敷德攻其西關臣親督官兵攻其東關同時並  
進該逆匿於關廂屋內施放槍礮臣傳令兵勇  
直前撲進斃賊百餘人賊見我兵勢猛又因壘

柵登時焚燒我兵隨殺隨進賊紛紛敗退我兵  
攻至城下門已緊閉卽將其三面關廂所築柵  
壘盡行焚燬查高唐州本非富饒之地城中倉  
儲糧米該州知州魏文翰儘數糶賣賊至無可  
擄掠存城火藥經撫臣調赴德州賊無所得臣  
揣度賊情此次率領逆衆南竄思與臨清之賊  
會合迫竄至高唐確知南援已絕乃遣逆黨潛

往連鎮送信令衆賊前來林逆爲此股渠魁衆賊聽其驅使則連鎮之賊必由此路南竄無疑所慮此處未卽殄除而北賊續至實不免腹背受敵之虞臣前咨僧格林沁將新調吉林馬隊分撥五百名庶兵力稍增以便派撥迎截防賊續竄連鎮南路空虛步隊未敢遽調僅抽撥正定固原及健銳營官兵共一千餘名令其速行

日內可以趕至卽當設法攻擊俾無噍類再當  
移師北向會剿連鎮之賊如連鎮之賊日內竄  
出臣亦當設法迎擊以免勾結

勝保又奏言臣恭奉

諭旨飭令百勝王夢齡酌派兵勇渡河迎截查徐州豐  
工一帶防河最關緊要雖南賊未必遽敢續渡  
而江皖賊氛尙熾仍宜思患豫防該處兵勇本

不甚多若再分撥未免更形單弱擬令此次酌  
撥兵勇卽於渡河後在豐沛所屬及黃河口岸  
扼要之地據守嚴防聽候臣隨時調遣如果賊  
蹤南竄該處臣督兵追剿徐州兵勇正可前進  
迎截似覺更有裨益奏入

上命軍機大臣傳諭勝保曰逆匪困守孤城其勢益蹙  
且據稱城內糧米甚少火藥已調赴德州賊無所得

正可乘此機會設法進攻勿令乘閒脫逃連鎮南路  
空虛該逆知我軍圍攻高唐必亟思南竄以冀兩股  
會合該大臣現已咨調吉林馬隊五百名並抽撥正  
定固原等營兵一千餘名趕赴高唐其連鎮南路仍  
當設法兼顧斷不可使北賊續來致我軍有腹背受  
敵之患該大臣請將徐州兵勇擇要據守著卽傳旨  
飛飭百勝王夢齡於兵勇渡河後卽在豐沛所屬及



黃河口岸扼要嚴防聽候調遣

同日向榮奏言據探上游賊船陸續駛回金陵並聞該逆有分竄句容來抄我營之說臣軍屯於鍾山之陽緊靠太平門出城之路因思該逆屢誘不出正可乘其外竄出奇攔截詎料賊知我兵有備始終不敢輕出二十七日探聞雨花臺踞賊防守疏懈卽派湖南貴州官兵攻打朝

陽門廣西兵勇攻打洪武門四川兵勇攻打通  
濟門而以將軍蘇布通阿分路來往督戰並派  
前提督福興總兵明安泰密帶兵勇先撲雨花  
臺賊營縱火夜攻乘該逆猝不及防盡燒其寨  
棚哨樓逆衆開礮迎拒堅不出營我軍過濠攻  
打該逆情急突從城內出賊千餘來襲我後各  
兵勇分投迎擊立斃賊匪數十人生擒六人餘

賊奔潰現在設法攻勦非有得力師船不足制沿江各城之賊臣前接兩廣督臣葉名琛咨稱所雇紅單船共五十號已由粵放洋隨經飛咨琦善專弁至上海迎提一面沿途飛催一面函知許乃釗待此船一入吳淞海口卽嚴飭督帶將官催令駛赴瓜州以備琦善調遣但念瓜鎮金陵賊勢輕重緩急不同勦辦宜分先後以現

在情形而論總以淨埽逆船肅清江面斷賊應援爲主現擬先勦瓜州趁勢南向夾攻克復鎮江至金陵爲首逆老巢賊船尤衆且爲上下游匯聚之區必得大幫戰船方足痛加埽蕩如果紅單船加倍得力可以先提二十隻駛至金陵上游扼要停泊攔勦來去賊船使賊南北不復聯絡然後會合陸軍加意堵勦便可埽穴擒渠

奏八

上命軍機大臣傳諭向榮曰官軍連日攻打太平朝陽各門並轟擊雨花臺賊營雖小有斬擒而該逆恃其壁壘高厚濠塹重疊總欲堅匿以老我師若但以陸路兵勇與堅城猾寇相持殊非籌畫全局之策該大臣因勦辦未能得手欲先淨埽逆船肅清江面斷賊應援擬先勦洗瓜州趁勢南向夾攻克復鎮江至金

陵賊船尤衆必須大幫戰船方足痛加掃蕩所奏機  
宜朕亦豫見及此是以昨諭琦善向榮將前調紅單  
船隻並現存各船酌量布置俾瓜州鎮江等處以次  
克復方能直駛上游制賊死命與和春等會合同擣  
金陵破其巢穴紅單船計日可到著卽與琦善籌商  
速行迎提並一面飛咨沿海文武催趲進口其水陸  
各路應如何併力夾攻之處著與琦善協力同心毋

得區分畛域致誤事機

上又命軍機大臣傳諭琦善曰逆匪竄踞瓜州久未克復總緣舟師不能得力所致此時紅單船指日入江自以先復瓜州爲第一要著鎮江金陵卽可次第進剿紅單船隻礮勇均可得力仍須駕馭合宜自可扼要制勝琦善與向榮雖分駐大江南北實則共辦一事總須彼此聲勢聯絡隨時知照務當乘此機會力

挫賊鋒肅清江面若能迅復瓜州併力進攻鎮江金陵斷賊南北兩岸分竄之路自不難一鼓成功也

同日崇恩奏言臣於初六日行抵高唐因連日風雨大作槍礮難施進攻尙未得手臣卽在州城東北紮營旣堵高唐之賊東竄兼防連鎖之賊南來一俟雨止天晴卽與勝保會商進剿不敢稽延至高唐失守情形臣沿路查訪逃出難



民咸稱初三日探報賊至而賊已到城該州魏  
文翰因兵勇無多難於抵敵當將城門關閉與  
營弁商議守城不料賊已由城東積土高處爬  
入奪開東門全隊闖入魏文翰罵賊不屈登時  
遇害

崇恩又奏言查賊匪竄踞高唐省城亟宜防範  
省西要隘以齊河爲第一層門戶該處大清河

尙屬有險可守然非在城西設防礙難迎擊臣  
先經咨商該處帶勇防堵之給事中毛鴻賓等  
囑其相機辦理茲據覆稱現已撥勇分駐城西  
之五里鋪扼守要路與城東營盤遙爲聲援並  
與前任藩司王簡知縣李金聲各營相爲犄角  
嚴密堵禦至邱家岸地方乃省西閒道亦令同  
知譚伯筠分撥練勇移紮實力嚴防

崇恩又奏言查逆賊竄踞高唐經臣勝保督兵  
追及臣亦帶兵續至連日所調礮位及大營步  
隊將次到齊合力進攻不敢刻緩但該逆攻急  
必竄竄必向南高唐正南在平西南清平均當  
衝要在平先經勝保派台祿帶領吉林馬隊四  
百名駐紮臣復飭令東昌府王觀澄撥勇三百  
名協同防守清平已由臣飭該縣崔燦帶勇四

百名在縣城東北一帶擇要堵禦臣稔知在平  
迪南東阿舊縣銅城驛有夾溝一道延亙十五  
六里兩崖壁立僅容一車若於此地設伏可期  
得力臣已派前兗州府岳齡帶領兵勇三百名  
在彼密伏以便要擊又慮該匪繞路潛由陽穀  
壽張等處奔逸並飛飭黃良楷速帶素習戰陣  
之練勇三千名在張秋鎮戴家廟各處分兵迎

勦其東泰兗濟各府州屢經嚴飭節節防範至連鎮之賊時防南竄是以臣自德州起行時所有柘園鎮富馬營二處之兵均未調動德平爲省北門戶藩司厲恩官駐彼正資控制亦未敢撤儻賊匪入境卽當盡力撓截與大軍前後夾擊不敢稍有疏虞奏入均報

十三日辛亥掌廣西道監察御史伍輔祥奏言查

賊匪重擾湖北已及宜昌而宜昌府屬之巴東  
與四川之巫山接壤巫山大昌營地勢險阻爲  
陸路入蜀關鍵又湖北之恩施縣與四川之萬  
縣亦有陸路可通應請

飭下四川總督迅調重兵駐紮大昌營另分兵於萬縣  
扼要防堵以截其入蜀之路至夔門三峽峽口

最窄爲水路入蜀關鍵亦須嚴防川省兵丁已  
多調往他省聞川東道所募鄉勇尙不乏人應  
令一併帶往以補兵力之不足奏入

上命軍機大臣傳諭裕瑞曰據御史伍輔祥奏湖北逆  
匪擾及宜昌該郡所屬之巴東地方與四川夔州所  
屬之巫山縣毗連又湖北之恩施縣與川省萬縣亦  
有陸路可通均爲入蜀門戶最關緊要著裕瑞迅派

得力將弁調撥精兵於各該處扼要防守斷賊匪入  
蜀之路並飭地方文武員弁於水陸要隘均各嚴密  
布置毋任竄匪乘間闖入至夔門三峽爲水路入蜀  
門戶亦須擇險防堵毋稍疏虞川東道所募鄉勇如  
果得力並著酌量調往以補防兵之不足仍責令各  
處緊要地方曉諭居民實力團練保衛鄉閭倣照嘉  
慶年間川省堅壁清野之法一律辦理以冀消患未



萌

十四日壬子台湧舒倫保奏言臣等接據探報賊

匪由朱家集竄入隨州由小路竄至應山縣城四十里之孟畝店揚言來撲縣城實欲乘間撲

營臣等熟商於初五日黎明臣台湧親率兵勇

先行馳至縣北之八里沖一帶相度地勢布置派令都司平德帶領陝甘河州等營官兵作爲

頭隊都司葉永泰等帶領湖北提標等營官兵  
作爲中隊臣舒倫保親率西安甯夏滿營官兵  
列爲後隊令署應山縣知縣聶光燮帶領該縣  
鄉勇作爲左右兩翼以防旁抄又先於通武勝  
關之楊家岡地方派增生王熙密帶鄉勇二百  
名埋伏以防偷竄布置甫畢卽見賊衆四五千  
人抄由東北山後蠶擁而來直撲我軍前隊臣

台湧指揮郡司平德督同河州鎮官兵槍礮截擊斃賊多名賊勢稍卻突有騎馬黃衣賊數十人躍出賊隊飛奔直前當經槍斃十餘名該逆等遂卽折回將賊衆分股橫衝疊經各軍四面轟擊賊勢不支四散奔逃皆抄由楊家岡僻路偷竄適遇伏勇截殺多名其餘翻山越嶺而逃者多被鄉民擊斃此次接仗自辰至酉鏖戰竟

日統計各隊斬獲首級八百十三顆生擒二百  
七名奪獲賊隊羸馬三百五十一匹槍礮旗幟  
等件不計其數所有出力文武員弁兵勇合無  
仰懇

天恩俯准臣等擇尤保獎以示鼓勵至應山後路現已  
肅清臣台湧卽當馳赴德安爲進攻漢陽之計  
臣舒倫保後隊兵尙未到仍當暫紮應山一俟

三  
催齊後隊再當會商進剿

同日青麐奏言查逆船分泊漢口小河及漢陽  
鸚鵡洲一帶沿江二十餘里均築立木柵土城  
並挖掘深濠徧插鐵竹各釘以爲負隅之計又  
將漢口通衢各巷全行堵塞沿路要口挖有陷  
坑埋伏地雷等物襄河各賊亦全數折回並揚  
言欲攻省城臣與文武將弁相機籌剿各兵勇

奮勇衝鋒數月來屢獲勝仗賊膽已寒其所以不敢深擣賊巢者因一面進攻一面仍須扼守兵分則少恐有顧彼失此之虞再四思維非漢口漢陽分路夾攻難期得手臣現激勵漢陽南鄉各堡紳民共舉鄉團爲背攻之計又探德安賊匪已退將軍舒倫保亦行抵信陽臣已將漢鎮賊匪情形詳細函致以便星夜前來分路背

攻庶幾前後夾擊可期一鼓殲擒均奏入

上命軍機大臣傳諭台湧舒倫保青磨曰賊匪以漢口漢陽爲巢穴台湧擬由德安進兵爲直擣漢陽之舉自應迅速進剿以通大江南北之路惟由德安進抵漢陽其勢不能直達必須隨剿隨進方能與武昌聯絡夾攻若竟恃雲夢等處現已收復銳意直前儻安陸等處逆匪乘我後路空虛復折而東北或德安等

處餘匪未淨復肆鴟張我軍均有腹背受敵之慮該督前令桂明直趨樊城由棗隨一帶前進卽可爲後路聲援著卽飛速咨催以資會剿舒倫保後起未到之兵已諭英桂等趕緊應付前進不日當可到齊若舒倫保能嚴扼德安迤南要隘桂明卽從隨州南向下攻安陸荆門上顧襄樊門戶亦可分投剿辦軍情變幻靡常總須隨時察看緩急寓慎重於神速以期



計出萬全本日據青磨奏報省城防守情形尙爲周密著卽嚴密防守遇有可乘之機隨時渡江攻剿以待江北援兵

上又命軍機大臣傳諭英桂楊需曰台湧舒倫保會剿隨州竄回應山之賊殲擒殆盡該督等卽由德安一路移兵南向次第進攻漢陽惟武勝黃土等關爲由楚入豫要隘桐柏唐縣各屬亦緊與楚境毗連官軍

一經南指則北路門戶空虛且前此由棗隨下竄逆  
匪仍踞擾安陸荊州一帶均不可不嚴密籌防以固  
豫省藩籬全豫防守事宜英桂責無旁貸楊需亦有  
協同防守之責著卽統帶現有兵勇剋日馳赴武勝  
關一帶扼要駐守妥籌堵剿柏山駐新野縣屬防禦  
邊界並著英桂楊需隨時酌量調遣不得任令該總  
兵飾詞巧避貽誤事機其歸陳光固一路與皖楚交

界處所仍責成徐廣緒牛鑑督飭各屬練勇認真堵截務須聯絡聲勢協助官軍以期周密所有舒倫保後隊未到官兵著英桂迅飭所屬飛催前進至由連鎮分竄高唐之匪仍恐伺隙南奔冀圖裹脅沿河各要隘尤宜嚴飭文武營汛分督兵勇實力巡防

上諭內閣曰此次竄回應山之賊經我兵痛加剿洗殲擒殆盡所有在事文武員弁兵勇著台湧舒倫保擇

其尤爲出力者覈實保奏仍著台湧等督飭官兵乘勝進攻漢陽漢口務將楚北賊匪悉數掃除毋任再滋蔓延

同日崇繪奏言臣聞西安將軍舒倫保帶兵來楚若能速剿漢陽賊匪後路約會省兵渡江夾擊可冀成功現在該處賊匪不過數千之衆乘其不防直搗巢穴不難殲除各處分布之賊無

所歸附卽可解散且楚北之黃安等州縣均與豫省道路相通賊蹤竄越靡常豈能到處分兵防堵今若不迅圖剿賊武昌勢難久持省會有失全楚不可問矣新任撫臣青廉到省已歷數月從未辦一得當之事惟以濫發功照爲能不顧名器沽譽市恩督臣台湧於賊竄德安時卽奔往豫楚交界避匿託故遷延置地方於不顧

至藩司岳興阿不能深悉漢字浮泛誇張公事  
毫無實濟不勝理繁治劇之任 臣不敢不據實  
直陳惟有仰懇迅

簡賢能大臣馳赴楚北查訪辦理 臣無能補救負罪良  
深今復抱病難支一切情形難以備陳奏入

上諭內閣曰前任湖北巡撫崇綸經朕擢任封疆宜如  
何通籌全局悉心經理乃於防勦事宜毫無布置以

致賊匪擾及黃州漢陽等處迨丁憂開缺復諭令留  
楚幫辦防勦輒以抱病入告實屬不知振作崇綸著  
卽革職